

1265-1265- OFP - Acta Capitulum Generalium Montepessulano Celebrati

In nomine patris et filii et spiritus sancti. Amen.

Acta capituli generalis in Montepessulano
celebrati anno Domini · M^o · CC^o · LXV^o ·

Confirmamus has constitutiones. In capitulo de recipiendis. ubi dicitur. ubi fuerit induendus. removeatur. ubi. et dicatur. pro quo fuerit induendus. Et hec habet · iii · capitula.

Item hanc. Quod fiat festum trium lectionum de beato Eduardo. et magister ordinis. provideat de officio. et de die. Et hec habet · iii · capitula.

Approbamus has. In capitulo de suffragiis. post illud. post festum sancti Dionysii est faciendum. addatur. anniversarium vero omnium sepulcorum in cimiteriis nostris. ubique fiat post octavas apostolorum Petri et Pauli. Et hec habet · ii · capitula.

Item hanc. In capitulo de gravi culpa. ubi dicitur. ipsum possit proclamare. addatur. si quis autem de mala familiaritate. notabiliter suspectus fuerit. et post monicionem a prelado de consilio discretorum fratrum. coram eisdem sibi facta pluries. se non correxisse fuerit deprehensus; priori provinciali et diffinitoribus sequentis capituli denunciatur. ut ipsi provideant ordinis honestati. Et hec habet · ii · capitula.

Item hanc. In eodem capitulo. ubi dicitur. de crimine. nisi possit probare. deleatur totum. et dicatur sic. de crimine. vel etiam de criminis auditu. nisi ipsum crimen possit probare. Et hec habet · ii · capitula.

Item hanc. In capitulo de sollempni celebratione capituli. in fine dicatur sic. capitulum autem generale. ultra sabbatum infra octavas penthecostes non prolongetur. nisi ex causa rationabili. magistro et diffinitoribus videatur. quod per unum vel duos dies ad plus. debeat prolongari. Et hec habet · ii · capitula.

Item hanc. In capitulo de visitoribus. ubi dicitur. secundum formam in electione diffinitorum. etc. usque ibi. vel plures. deleatur totum. et dicatur sic. a priore provinciali et diffinitoribus assignentur. Et hec habet · ii · capitula.

Item hanc. In capitulo de capitulo provinciali. ubi dicitur. et predicatorum generales. addatur. si qui tamen. qui non sint de capitulo. eligantur in diffinitores. [addatur.] ad omnia acta eiusdem dumtaxat capituli admittantur. Et hec habet · ii · capitula.

Item hanc. In capitulo de electione prioris provincialis. ubi dicitur. eligatur. si tunc fuerit celebrandum. addatur. quod si electores. vel eorum alterum contigerit impediri. antequam iter ad eundem ad electionem arripuerint. conventus alium. vel alios possit eligere loco illorum qui fuerint impediti. Idem dicimus de socio prioris conventualis euntis ad provinciale capitulum electo. Et hec habet · ii · capitula.

Item hanc. In capitulo de electione prioris conventualis. ubi dicitur. aliis iuris subtilitatibus relegatis. addatur. publicato autem scrutinio. et facta collatione numeri ad numerum. si minor pars. maiori consenserit; ille qui primam vocem habuit inter electores. sur-gens dicat. Ego talis. vice mea. et omnium electorum presencium. eligo. N. in priorem talis conventus. vel talis provincie. si provincialis eligatur. Si vero non omnes consenserint. sed maior pars. tunc sicut prius. qui primam vocem habuit. dicat. Ego talis pro me. et pro illis. qui mecum consenciant. eligo. N. etc. ut prius. Et hec habet · ii · capitula.

Item hanc. In ordinario in rubrica de festo beati Petri martiris. in fine dicatur sic. fiat etiam cotidie. memoria usque ad octavam diem. per antiphonam ad matutinas Petrus novus. et ad vespervas. per antiphonam. ad sancti Petri. Et hec habet · ii · capitula.

Item. De beato Gregorio. fiat festum semiduplex. Et hec habet · ii · capitula.

Inchoamus has. In capitulo de officio. ubi dicitur. surgant fratres dicendo officium beate virginis. deleatur dicendo. et dicatur sic. surgant fratres. et stando dicant officium de beata virgine.

Item hanc. In capitulo de gravi culpa. in fine dicatur sic. si quis autem scienter aliquem diffamaverit. non possit absolvi. nisi famam fratri restituat apud illos; penes quos diffamavit. prout et quando fuerit opportunum.

Item hanc. In capitulo de electione prioris conventualis. ubi dicitur. fratres post duos annos a professione sua. deleatur. post duos annos a professione sua. et dicatur sic. fratres autem professi. post · v · annos ab ingressu etc.

Item hanc. In capitulo de capitulo provinciali. ubi dicitur. infra vero idem tempus. deleatur. idem tempus. et dicatur sic. infra vero quinquennium ab ingres-su. etc.

Item hanc. In capitulo de electione magistri. ubi dicitur. ad capitulum veniant generale. addatur. si vero in aliqua provincia iam capitulum provinciale fuerit celebratum. et in proximo festo penthecostes. electio magistri fuerit facienda. prior provincialis illius provincie. cum duobus prioribus conventualibus. qui primitus nostri ordinis habitum susceperunt; ad dictam electionem veniant faciendam. quorum antiquior in ordine. si annus fuerit provincialium; ad diffinitionem pariter admittatur.

Item hanc. In capitulo de electione prioris provincialis. ubi dicitur. ad priores conventuales. et duos fratres de quolibet conventu. ad hoc idem electos. deleatur. duos fratres ad hoc idem electos. et dicatur sic. et unum fratrem ad hoc idem electum. et ubi dicitur infra. unus autem de illis duobus electoribus. etc.

usque ibi. si tunc fuerit celebrandum. deleatur totum. et dicatur sic. dictus vero elector sit socius prioris conventualis ad provinciale capitulum. illo anno; si tunc fuerit celebrandum.

Item. In capitulo de sollempni celebratione capituli. post illud. cum consilio respondeatur. addatur. perlectis autem literis. et facta recommendacione vivorum; dicatur psalmus. ad te levavi. kyrie eleison. pater noster. cum versiculo. salvos fac. et oracione. pretende.

Item hanc. In capitulo de predicatoribus. post illud. infra · xxv · annos. addatur. nec predicet populo. nec confessiones extraneorum audiat. sine licencia prioris sui. in capitulo de consilio discretorum sibi data.

Item hanc. In capitulo de capitulo provinciali. post illud. cum consilio discretorum elegerit. celebretur. addatur. in provincia tamen. in qua generale capitulum celebratur. poterunt diffinitores provincialis capituli eligi; ante terminacionem capituli generalis.

Item hanc. In capitulo de electione prioris provincialis. in fine addatur. statuimus autem. quod in singulis provinciis. priores provinciales cum diffinitoribus capituli provincialis instituant vicarios aliquos. per totam provinciam. quibus certas domos visitandas. et corrigendas assignent. qui vicarii in domibus sibi assignatis. plenarie gerant vices prioris provincialis. excepta duntaxat institucione. et destitucione priorum et lectorum. et ubique teneant loca sua. nisi in capitulo. dum officium vicarie sue exercent. Hos autem vicarios. priores provinciales possint corrigere. vel amovere. et si aliquem mori. vel amoveri contigerit. prior provincialis alium possit instituere. usque ad capitulum provinciale.

Iste sunt admoniciones.

Admonemus. ut priores provinciales reddant se difficiles ad dandum licenciam fratribus ad capitula veniendi.

Item. Cum fratres ad loca de novo recepta mittuntur; illis locis simpliciter et totaliter assignentur.

Item. Nullus infra · xv · annum completum. recipiatur ad ordinem. sine prioris provincialis licencia speciali.

Item. In festo sanctorum Dominici confessoris. et Petri martiris. fratres in domibus nostris opera fieri non permittant.

Item. In provinciis illis. ubi non est lectorum copia. lectores. quamdiu possunt exercere officium lectionis; non occupentur in officio prioratus.

Item. Per priorem provincialem. et diffinitores capituli provincialis. ordinetur in provinciis que indigent studio arcium. ut iuvenes ad profectum ydonei transmittantur.

Item. In conventibus ubi sunt studia generalia. ad legendum cursorie sentencias singulis annis. frater aliquis ydoneus assignetur.

Item. Magister studencium in qualibet septimana fratres advocet. maxime iuniores. et eos examinet super lectionibus et questionibus; quas per epdoma-dam audierunt.

Item. Visitatores in suis visitacionibus. diligenter inquirent. quid et quantum lectores in anno legerunt. quociens disputaverunt. qualiter priores studium promoverunt. et quomodo fratres studio intenderunt. et hoc priori provinciali et diffinitoribus referant. a qui-bus si qui circa premissa negligentibus fuerint; gravius puniantur.

Item. Libri ordinis. sine licencia prioris provincialis; extra ordinem non vendantur.

Item. Visitatores a capitulo deputati. ad capitulum veniant. ea que invenerint; fideliter relaturi.

Item. Per visitatores. curiositates quas invenerint in corrigiis. libris. fibulis. cultellis. baculis. et vestibus; severius corrigantur.

Item. Fratres qui de licencia magistri. vel prioris provincialis. pecuniam receperint. prioribus suis quantum. et a quibus personis receperint; quam cicius exponere non obmittant.

Item. Interdicit magister ordinis. prioribus conventualibus. et fratribus universis. ne aliquem in [aliqua] religione professum ad ordinem recipiant; sine suorum priorum provincialium licencia speciali.

Item. Fratres. qui procuratori ordinis literas miserint. clare et aperte. et sine abbreviacione locorum. et personarum. cum integra expressione nominum. et cognominum. diocesum. et dignitatum. scribant. et omnium literarum tenorem. quas domino pape. vel cardinalibus mittunt. communiter vel divisim eidem procuratori transmittant.

Item. Priores. ad habendum libros ecclesiastici officii. secundum novam correctionem; dent operam efficacem.

Item. Rogamus priores et fratres universos. quod cum ad honorem beati Dominici patris nostri fiat Bononie structura sollempnis. si de alicuius pecunie dispensacione vel aliunde honeste aliquod subsidium impertiri voluerint. illud priori Bononiensi transmittant. ne propter defectus expensarum; opus remaneat incompletum.

Ista sunt suffragia.

Pro domino papa. et statu tocius ecclesie etc.

Relinquimus magistro ordinis. ut ipse de studiis generalibus. diligenter ordinet et disponat. prout utilitati ordinis viderit expedire.

Priori provinciali Theotonie. quia remisit aliquos studentes ad provinciam suam. prout nobis per suas literas constitit. iniungimus · xii · dies in pane et aqua. et singulis diffinitoribus capituli provincialis proximo preteriti dicte provincie. qui consenserunt in hoc; iniungimus · viii · dies in pane et aqua.

Absolvimus priorem provinciam Theutonie. Priores conventuales Tolosanum G. Bernardi. Massiliensem. Baionensem. Lemovicensem. Arelatensem; et Castrensem G. de bono Solacio.

Capitulum generale sequens assignamus in provincia Theutonie; apud Treverim.

Magister ordinis imponit. quod quilibet conventus dicat unam missam de beata virgine pro domino papa.

Actis additae sunt litterae magistri ordinis.